

DOMINGU IV TEMPU KUAREZMA – TINAN B

Tema

Liturjia Domingu Dahaat Kuarezma nian garante ita katak Maromak oferese mai ita, ho forma totalmente gratuita no inkondisionál, moris rohan-laek.

Leitura dahuluk dehan mai ita katak, bainhira ema haketak an husi Maromak no hili dalan sira egoízmu no autosufisiénsia nian, nia harii futuru ida marka ho terus no mate. Maski nune'e, autór Livru Crónicas nian dehan, Maromak fó nafatin ba nia Povu possibilidade seluk atu hahú fali, atu halo fali dalan esperansa no moris foun nian.

Leitura daruak hanorin katak Maromak hadomi ema ho domin totál, inkondisionál, sukata-laek; domin ne'e mak foti ema husi ninia kondisaun finitude no frakeza nian no oferese ba nia mundu foun moris nakonu no ksolok nian ne'ebé hein ita iha ita-nia ezisténsia nia rohan.

Iha *Evanjellu*, João fó hanoin mai ita katak Maromak hadomi ita to'o haruka nia Oan-Mane mesak atu haraik mai ita moris rohan-laek. Ita simu konvite atu hateke ba Jezús, atu aprende ho Nia lisaun domin totál nian, atu la'o ho Nia iha dalan entrega no don moris nian. Ne'e mak dalan salvasaun nian, moris nakonu no definitivu nian.

LEITURA I – 2 Cr 36,14-16.19-23

Livru Crónicas nian mak obra autór anónimu ida nian, ne'ebé hakarak oferse istória Israel nian, husi kriasaun mundu nian, to'o época Ezíliu nian. Tradisaun judaika atribui obra ne'e ba Esdras; maibé ita labele prova ipóteze ne'e. Livru ne'e halo parte bloku ida ho unidade ruma (hamutuk ho livru Esdras no Neemias nian) ne'ebé baibain hanaran nu'uda “Obra Kronista nian”.

Investigadór sira no komentadór sira Livru Crónicas nian propoin ipóteze oioin ba datasaun obra nian (entre 515 mK no 250 mK). Iha tempu ikus ne'e, autór ruma ko'alia kona-ba prosesu ida ho etapa lahanesan... Iha tinan \pm 515 mK mosu edisaun dahuluk obra nian, ho finalidade atu lejitima kultu “iha Templu daruak” (Templu harii hias bainhira judeu sira fila husi Ezíliu iha Babilónia); entre 400 no 375 mK, karik mosu edisaun daruak, ho finalidade atu subliña Esdras nia autoridade nu'udar lejisladór no intérprete Torah nian; entre 350 no 300 mK, mosu edisaun datoluk, atu anima, hametin no konsolida comunidade judaika ne'ebé hasoru viziñu sira ne'ebé sai sira-nia funu-balu, liuliu samaritanu sira.

Testu ohin nian mosu iha parte finál volume daruak Livru Crónicas nian. Kronista refere faktu istóriku rua ne'ebé dook malu besik tinan 50: Nabucodonosor ne'ebé hadau Jerusalém (586 mK) no liurai Ciro nia autorizasaun atu judeu sira iha Ezíliu fila ba Jerusalém (538 mK). Iha klaran, Maromak nia Povu koko esperiénsia dramátika Ezíliu nian iha Babilónia.

Maski nune'e, autór nia interese mak fó interpretasaun teolójika faktu sira-nian duké hato'o akontesimentu istóriku sira didi'ak. La'ós istoriadór eh analista polítiku ida mak ko'alia, maibé fiar-na'in ida ne'ebé buka atu lee istória iha fiar nia roman no hasai konkluzau sira.

MENSAJEN

Ba Kronista, destruisaun Jerusalém nian, sasunuk/inséndiu Templu nian no deportasaun Maromak nia Povu nian ba Babilónia mak rezultadu lójiku salan nasaun nian. “Ulun sira Judá nian, amlulik sira no Povu nia fidelidade sai wain ba beibeik” (vers. 14); sira lakohi rona Maromak nia avizu sira liuhusi profeta sira no despreza sira-nia apelu sira... Entaun, Na'i nia

laran-hirus tuun ba nia Povu lahó laran-sadia (vers. 15-16). Tempu Ezlíliu nian rasik nia durasaun (no autór tau ho númeru la ezatu maibé simbóliku tinan 70 nian – katak hitu dala sanulu) sai nu'udar jubileu boot ne'ebé Maromak haraik, tempu ida kompensasaun nian atu taka loron sábadu sira (loron dahituk) ne'ebé Povu la respeita no la kumpre nia obrigasaun sira ba Jahwéh. “Maromak nia rai”, ne'ebé injustisa no salan haterus, tenke deskansa durante tina hitunulu, to'o Maromak hafoun nia no sai filafali Maromak nia Povu nia “uma” (vers. 21).

Iha leitura istória ne'e nia kotuk, ita haree hanoin eh konseitu kona-ba Maromak nia justisa tempu primitivu nian: bainhira Povu moris iha fidelidade ba Aliansa no ba ukun-fuan sira, Maromak ofere se moris no ksolok; bainhira Povu infiel ba kompromisu sira asume, sira hetan mate no desgrasa.

Kronista konxiente katak kastigu la'ós liafuan ikus Maromak nian. Versíkulu ikus sira (vers. 22-23 – rezumu ida ba Esd 1,1-4) hatudu ba sentidu ida esperansa nian no hahú hikas nian. Referénsia ba libertasaun ne'ebé Ciro fó no éditu ne'ebé autoriza makhorik sira Judá nian atu fila hikas ba sira-nia rain, ita hetan ideia katak Maromak la abandona nia Povu no kontinua haraik ba nia, iha momentu ida-idak istória nian, possibilidade atu hahú filafali.

LEITURA II – Ef 2, 4-10

Sidade Éfeso nian hela iha Ázia Menór parte loromonu nian. Sidade ne'e sidade boot no próspera, kapitál Provínsia Romana Ázia nian. Ninia portu liga interiór Ázia Menór nian ho sidade sira Mediterrâneo nian.

Bainhira Paulo to'o iha Éfeso (kf. Apóst 19,1), durante ninia viajen misionária datoluk, nia hetan sarani sira la iha preparasaun eh uitoan de'it. Paulo hanorin sira no ho sira nia forma comunidade sarani ida. Tuir Livru Apóstolu sira nia Hahalok, Paulo hela iha sidade durante período naruk ida (liu tinan rua, Apóst 19,10), hodi hanorin iha sinagoga sira no, hafoin, iha “eskola Tirano” nian (Apóst 19,9). Nune'e, nia halibur númeru ida ema sira ne'ebé konverte ba “Dalan” (Apóst 19,9.23). Lucas mós haktuir katak, ba katuas sira Kreda Éfeso nian nak Paulo entrega, iha Mileto (kf. Apóst 20,17-38), ninia testamentu espirituál, apostóliku no pastorál, molok ba Jerusalém, hodi hetan dadur. Buat sira-ne'e hotu halo ita hanoin katak iha relasaun metin liu entre Paulo no comunidade sarani Éfeso nian. Buat ne'ebé halo ita husu mak, surat ba sarani sira Éfeso nian ne'e ladún pesoál no la hatudu relasaun ne'e. Tanba ne'e mak komentadór ba testu Paulo nian balun duvida, katak surat ne'e Paulo nian. Balun fali, hanoin katak testu ne'ebé to'o mai ita ho naran “Surat ba Éfeso nia oan sira” mak ezemplár ida “surat sirkulár” ne'ebé haruka ba kreda sira Ázia Menór nian – inkluzive comunidade sarani Éfeso nian.

Surat ba sarani sira iha Éfeso apresenta an nu'udar Paulo nia hakerek, iha altura ida iha ne'ebé Paulo hela iha kadeia (iha Roma?). Ninia maklorik/portadór mak Tíquico. Ita iha tinan 58/60 nune'e. Surat ne'e mak testu ida ho rikusoin temátiku boot, relfesaun tasak no kompleta iha-ne'ebé autór apresenta sínteze ida Paulo nia teolojia nian.

Testu ne'ebé ohin propoin mai ita integra iha parte dogmátika surat nian (kf. Ef 1,3-3,21). Atu halo konkretu liután, testu apresenta mai ita reflesaun ida kona-ba Kristu nia papél iha ema nia salvasaun. Autór hahú husi konstataasaun situasaun salan ema moris bá, iha-ne'ebé, ho nia kbiit rasik nia labele sai. Pergunta mak ne'e: Nune'e, ema simu kondensasaun ba moris-atan/eskravidaun salan no mate nian ba nafatin?

MENSAJEN

Maromak riku iha laran-sadia no hadomi ema ho domin boot tebes. Tanba ne'e, ba ema nia situasaun salan nian, Maromak hatán ho nia grasa (vers. 4). Domin makso'in no libertador Maromak nian la'ós domin kondisionál ida, ne'ebé haraik de'it ba ema se ema ne'e konverte an; maibé domin inkondisionál ida, ne'ebé atinje ema maski nia kontinua la'o iha dalan sira salan no mate nian (vers. 5).

Ba ema loko-an ida-ne'e no autosuficiente, tuur metin iha egoizmu no salan, Maromak oferese moris foun ida, hodi halo nia moris hi'as no halo nia tuur ho Kristu iha lalehan (vers. 6). Ita haree ba partikulár ne'e: autór Surat ba sarani sira iha Éfeso la refere ba moris-hi'as no glorifikasaun ema nian nu'udar buat ruma iha futuru, maibé buat ruma iha pasadu (tempu gregu 'aoristo', iha signifikadu pasadu nian). Maski nune'e, asaun uluk nian ne'e afeta tempu prezente no iha implikasaun iha prezente... Hodi sai ida ho Kristu, sarani moris hi'as ona no hetan ona glória; nia kontinua moris iha rai, sujeitu/hakruuk ba finitude no limitasaun sira moris prezente nian maibé, iha-ne'e no oras-ne'e, nia sai ona sidadaun ida lalehan nian. Maromak, introdús tiha ona iha ema nia natureza umana ne'ebé fraka no frajil, dinamizmu sira moris rohan-laek nian. Nia konsekuénisa mak sarani nia moris, marka tiha ona ho kondisaun rua: frajilidade no eternidade. Maski iha limite no frakeza, ema sarani tenke fó sasin no haklaken moris foun ne'ebé Maromak oferese tiha ona ba nia iha rai ne'e.

Iha espozisaun ne'e tomak ita hetan elementu ida ne'ebé autór Surat ba sarani sira iha Éfeso fó importánsia boot: gratuidade Maromak nia obra salvasaun nian. Salvasaun la'ós ema nia méritu, maibé Maromak nia don loos de'it. Tanba ne'e mak la iha fatin ba sentimentu orgullu nian eh ba atitude fó glória ba an rasik. Salvasaun mak oferta gratuita Maromak halo ba ema maski ema la merese (vers. 9).

Husi oferta salvasaun ne'ebé Maromak halo ba ema, moris mai ema foun ida, ne'ebé pratika hahalok di'ak sira. Hahalok di'ak sira la'ós kondisaun atu simu salvasaun, maibé rezultadu husi asaun grasa nian husi Maromak, ne'ebé iha ninia domin no laran-di'ak, haraik gratuitamente ba ema sira (vers. 10).

EVANJELU – Jo 3, 14-21

Ita-nia testu pertense ba sesaun introdutória Evanjellu Dahaat nian (kf. Jo 1,19-3,36), iha-ne'ebé personajen oioin mosu atu apresenta kona-ba sé mak Jezús.

Testu ohin nian halo parte konversa entre Jezús no “xefe judeu nian ida” naran Nicodemos (kf. Jo 3,1). Nicodemos bá vizita Jezús iha “kalan” (kf. Jo 3,2), karik atu hatudu katak nia lakohi tau nia pozisaun iha estrutura relijiza judaika iha perigu. Membre Sinédrio nian, Nicodemos ikusmai sei mosu, atu defende Jezús iha xefe farizeu sira nia oin (kf. Jo 7,48-52). Ita mós hetan nia iha altura ne'ebé ema hatuun Jezús husi krús no tau iha rate (kf. Jo 19,39).

Konversa entre Jezús no Nicodemos apresenta etapa tolu. Dahuluk (kf. Jo 3,1-3), Nicodemos rekoñese Jezús nia autoridade, tanba nia obra sira; maibé Jezús hatutan katak ida-ne'e la suficiente: esensiál mak rekoñese Jezús nu'udar Aman nia manu-ain/enviadu. Daruak (kf. Jo 3,4-8), Jezús anuncia ba Nicodemos katak, atu komprende ninia proposta, presiza “moris husi Maromak” no esplika katak moris foun ne'e mak moris “husi bee no Espíritu”. Datoluk (kf. Jo 3,9-21), Jezús deskreve ba Nicodemos projetu salvasaun Maromak nian: ne'e mak insiativa ida Aman nian, sai prezente iha mundu no ema sira nia moris liuhusi Oan-Mane no konkretiza ho krús/ezaltasaun krús nian. Ita-nia testu pertense ba parte datoluk ne'e.

MENSAJEN

Jezús hahú hodi esplika ba Nicodemos katak Mesias tenke “foti sa'e aas”, hanesan “Moisés foti sa'e samea” iha rai-fuik (samea riti Moisés halo atu kura sira ne'ebé samea tata – kf. Nm

21,8-9). Ilas “foti-sa’e nian” Jezús uza refere ba krús – nesesáriu atu to’o ba vida definitiva. Iha krús mak Jezús hatudu nia domin no hatudu ba ema sira dalan atu sira liu nune’e hetan salvasaun (vers. 14).

Sira prezisa fiar iha “Mane Makso’ik” foti sae iha krús, atu la lakon maibé hetan moris rohan-laek. “Fiar” iha “Mane Makso’ik” signifika adere ba Nia no ba nia proposta moris nian; signifika aprende lisaun domin nian no halo hanesan Jezús, don total moris rasik nian ba Maromak no maluk sira (vers. 15).

Maibé, katak sá, Jezús nia krús? Oinsá mak krús fó moris definitivu ba ema?

Jezús, “Oan-Mane mesak” ne’ebé Aman haruka atu lori vida definitiva, mak don boot domin Maromak nian ba humanidade. Espresaun “Oan-Mane mesak” fó hanoin “Isaac nia sakrifísiu” (kf. Gn 22,16): Maromak nia hahalok hanesan Abraaun nian, nia iha kapasidade atu husik nia oan rasik tan domin (iha Abraaun, domin ba Maromak; iha Maromak, domin ba ema sira)... Jezús, Maromak nia “Oan-Mane mesak”, mai iha mundu atu kumpre Aman nia planu ba ema sira nia di’ak. Tan ne’e mak nia inkarna iha ita-nia istória umana, asume ita-nia frajilidade, partilla ita-nia humanidade; nu’udar konsekuénsia ba luta hasoru nakukun ne’ebé halo ema sai atan, ema kaer nia, tortura nia no oho nia iha krús. Krús mak hahalok ikus moris ida iha domin, iha doasaun, iha saran an. Nune’e, krús mak espresaun aas liu Maromak nia domin sukat-laek ba ema sira hodi oferese salvasaun (vers. 16).

Sá loos Maromak nia objetivu atu haruka nia Oan-Mane mesak? Atu liberta sira husi egoíзму, moris-atan, alienasaun, mate, no fó moris rohan-laek. Ho Jezús, ema sira aprende katak moris definitivu konsiste iha obediénsia ba Aman nia planu no iha don moris nian ba maluk sira.

Mesias mai iha mundu la’ós atu halo justisa hodi tesi lia; Nia mai atu oferese ba ema hotu moris definitivu, hodi hanorin sira atu hadomi lahó sasukat no haraik ba sira Espíritu ne’ebé nakfilak sira iha Ema Foun (vers. 17).

Maromak la haruka nia Oan-Mane mesak atu buka ema di’ak, santu, perfeito; maibé Nia haruka nia Oan-Mane mesak atu buka ema maksalak sira, egoísta sira, autosuficiente sira, atu apresenta proposta foun moris nian... Jezús nia domin – nune’e mós Espíritu ne’ebé Jezús husik mai ita – mak nakfilak ema sira ne’e no hatama sira iha dinámika moris foun no moris nakonu nian.

Iha Maromak nia oferta salvasaun nia oin, ema tenke halo nia hilin. Se nia aseita Jezús nia proposta no adere ba Nia, nia hili vida definitiva; se nia prefere kontinua sai atan ba eskema sira egoíзму nian no auto sufisiénsia nian, nia hasai nia an husi salvasaun. Salvasaun no kondensasaun la’ós prémiu ne’ebé Maromak fó ba ema tanba ninia komportamentu di’ak eh aat; maibé rezultadu husi ema nia hilin livre, iha Maromak nia oferta inkondisionál salvasaun nia oin. Responsabilidade ba vida definitiva eh ba mate rohan-laek, la monu ba Maromak maibé ba ema (vers. 18).

Tuir perspetiva João nian, la eziste mós julgamentu ida abanbairua, iha tempu nia rohan, iha-ne’ebé Maromak tetu iha dasin ema nia salan sira, atu haree se salva eh kondena nia: juízo realiza iha-ne’e no agora no depende ba atitude ne’ebé ema asume hasoru Jezús nia proposta. Iha parte ikus testu nian (vers. 19-21), João repete tema opsaun ba moris (Jezús) eh ba mate. Nia konstata katak, dalaruma ema rejeita Maromak nia proposta no prefere moris-atan no nakukun nian (egoíзму, injustisa, orgullu, autosufisiénsia, buat hotu ne’ebé impede ema atu haksolok no iha asesu ba vida definitiva). Ema ne’ebé pratika hahalok domin nian (Jezús nia obra sira) hili naroman, identifika an ho Maromak no fó sasin kona-ba Maromak iha mundu.